

Katika Siku ya Hukumu,

Aliye mwaminifu katika lililo dogo sana, huwa mwaminifu katika lililo kubwa pia.
Luka 16:10.

Ni kuwa na umakini mkubwa katika kile ulimwengu unachokiita “mambo madogo” kunakofanya maisha kuwa yenye mafanikio. Matendo madogo ya upendo, matendo madogo ya kujikana nafsi, kunena maneno rahisi yenye manufaa, kujiepusha na dhambi ndogo huu ndio Ukristo. Kushukuru kwa baraka za kila siku, kutumia kwa hekima fursa za kila siku, kukuza vipawa tulivyokabidhiwa kwa bidii hiki ndicho Bwana anachotaka.

Yule ambaye hutenda kwa uaminifu kazi zilizo ndogo ataandaliwa kufanya wajibu mkubwa zaidi. Mtu ambaye ni mwema na mstaarabu katika maisha ya kila siku, ambaye ni mkarimu na mstahimilivu katika familia yake, ambaye lengo lake daima ni kuifanya nyumba yake kuwa na furaha, atakuwa wa kwanza kujikana nafsi na kujinyima Bwana atakapoita...

Safari ndefu hutimizwa kwa kupiga hatua moja baada ya nyingine. Mfuatano wa hatua hutufikisha mwisho wa safari. Mnyororo mrefu huundwa na viunganishi mbalimbali lilivyotenganishwa. Ikiwa kiunganishi kimojawapo kitakuwa kibovu, mnyororo huo hautafaa. Hivyo ndivyo ilivyo katika suala la tabia. Tabia njema huundwa na tendo moja lililotendwa vizuri. Uovu mmoja, uliopaliwa badala ya kuushinda, husababisha mtu kutokuwa mkamilifu na kumfungia nje ya malango ya Mji Mtakatifu. Yeyote atakayeingia mbinguni lazima awe na tabia isiyo na waa wala kunyanzi wala lolote kama hayo. Chochote kilichotiwa unajisi kamwe hakitaweza kuingia pale. Katika jeshi lote la waliokombolewa hakutakaoonekana aina yoyote ya uovu.

Kazi ya Mungu ni kamilifu kwa ujumla wake kwa sababu ni kamilifu katika kila kipengele, haidhuru kiwe kidogo kiasi gani. Anasanifu ncha ndogo ya jani kwa umakini mkubwa kama ambavyo angetumia kuumba ulimwengu...

Chochote kile ambacho kwa vyovyote vile kinastahili kufanywa kinastahili kufanywa vyema. Haidhuru kazi yako iwe ya namna gani, ifanye kwa uaminifu. Sema kweli kwa mambo madogo kabisa. Kila siku tenda matendo ya upendo na kuongea maneno yanayofurahisha. Sambaza tabasamu kote katika njia ya maisha. Kama utatenda kwa jinsi hii, Mungu ataweka kibali juu yako na siku moja Kristo atakwambia “vema, mtumwa mwema na mwaminifu.”

Katika siku ya hukumu, wale waliokuwa waaminifu katika maisha yao ya kila siku, ambao wamekuwa wepesi wa kutambua wajibu wao na kuufanya, bila kufikiri kuhusu kusifiwa na faida watakayoipata, watasikia maneno haya “Njoni, mliobarikiwa na Baba yangu, urithini ufalme mliowekewa tayari tangu kuumbwa ulimwengu.” Kristo hawapongezi kwa sababu ya hotuba walizotoa kwa umbuji, uwezo wa kiakili waliouonesha au mchango wao wa ukarimu walioutoa. Wanapata thawabu kwa sababu ya kufanya mambo madogo ambayo kwa kawaida hayazingatiwi. “Kwa maana nalikuwa na njaa, mkanipa chakula,” Kristo atasema. “Kadiri mlivyomtendea mmojawapo wa hao ndugu zangu walio wadogo, mlinitendea mimi” (Youth’s Instructor, Januari 17, 1901).